

*Atuagaq nutaaq*

# Taallat erinallit

*Hal:* Toqussi ukiualunnik sioqqullugu Villads Villadsenip taalliani toqqortersimasani katersorlugit ataatsimut atuaganngortinniarlugit eqqarsaatigisimavai. Taallat erinnallu katillugit 117-it, pisoqaanerpaaq 6/12 1940-mi ulluligaalluni ukiuligaallunilu nutaanerpaarlu 23/8 2000-imi, tassa inuunerup ilaani ukiuni 60-ini oqaatiginiakkat taallanngortitat. Tamarluinnaasali taalliarinngilai, tassa allat taalliaat amerlanngitsut erinalikkani erinaat pinerugunarlugit ilannguttarsimagamigit.

Taallat misissutsiarlugit taalliai pisoqaanerit asanninnermut asannikkaluarlunilu patajasumik misigissuseqa-



lernermit tunngasut tiguartisimaarnarput. Assersuutissaapput taalliaa pisoqaanerpaaq ilaatigut ima oqaasertalik: "ilukkut erloqinera / sulii ilaar-

tuarniarpiuk", kiisalu ukiut marlussuit qaangiummata erinarsorpoq: "ila, qanoq misigilerluni / isumaqatigiilluarluni / ataatsitut inuuneqarluni / ataqqeqatigiilluarluni". Taallat taamaattut taalliorortoq soqtiginarsisipaat taalliornerup inummut namminermut inuunermullu tunngasuunera naqissuseramikku.


Taallat allat 1945-p missaanit pingortitat sammisamikkut imaat ukiup kaajallakkiartorneranut tunngapput, allallu nunagisap alianaanneranik nersorinnissutaallutik. Illoqarfiit najorsimasat tamakkerlugit oqaasissaqarfigalugit illugit taalliarisarsimavai, annermilli oqaatigisariaqaqqoorpoq



Ammassallup taalliortuatut taaneqarsinnaanera. Inuuneq tassani ingerlassaq inuusunnermini tikippaa ilagiinni atuarfimmilu kiffartuutilittut najuleramigit. Malunnartumik inui akuliuffigalugit inooqatigisimavai. Manngunnerani inuit anisersimaffiliaasut peqatigisarsimavai, tamakkunanilu inuuneq taallatut oqaatigalugu. Inuuneq artornartorsuarnik atugaarukkallarnep nalaq, peqqumaasiornerullu ulapaartitsineranik imalik, naak meeqqat tamani tamaani pinnguarlutik anaanaminnik ammerisunik igaartortunillu akornusersuisaraluartut.

Utoqqaliartornermini taalliai kitaani inuunermut saapput, Ammassalik qimallugu Disko Bugtimi illoqarfiit najortakkani taallatut oqaasertalersuleramigit. Qeqertarsuaq annermillu Qasigiannugit ukiorpanni kisarsimaarfini, aamunali nalliuttorsiornerit kunngikkorsiornerillu mininnagit. Partii ataaseq taalliarisimavaa, Inuit Ataqtigiit. Kalaallisut inuunermut ilisarnaatit assigiinngitsut pingaartikkai nalunangilaq, soorlu qajaq imikkut taalliami ilaanni oqaatigaa. Taallalli aamunaa tussiutitut taaneqarsinnaasut arlalinnugit misilissimallugit.

Villads Villadsenip taallioriaaseq ilinniarsimasani taallioqqaartalernerminit atugaraa. Taalliai pisoqaanerit malunnartumik ilinniarsissuarmi ilinniartitsisuata Jonathan Petersenip ilinniusiaanut "metrik"-imut qanillatortumik suliaapput, pingaartumik naggateqatigiissaarineri periaasissat malikannersimallugit. Utoqqaliartortilluni taallioriaatsip taassuma "navianartortai" taallani arlalinni atulersoor-



## Villads Villadsen Inuillami serrarpalaaq *taallat erinartallit*

Aasiisoq Ebbe Mortensen 1974

tarpai, tassa versit naaneri tamaasa assigiinnmik naanilerlugit inerniartarsimagamigit. Annermik oqaluut aneq pingajuannik kinaassusersiutilik '-poq' naanertilerangagu atuarnerat oqimaakujulersarpoq assigiiaalerlunilu. Tassuuna ilinniartitsisimi periaasia qimattoortarpaa.

Erinniaanut tunngatillugu aamma oqaatigisariaqarpoq Jonathan Petersenip erinnioriaatsimik ilinniartitanut ikkussaa atoraa. Nipilersorsinnaasulli tamanna annerusumik oqaaseqarfigisinnaavaat. Oqaatigisariaqarpoq erinarsoqatigiippassuit nunatsinni illoqarfinni siaruarsimasut kingumut

periarfissinneqartut taallanik erinalinik taakkuninnga misissuullutillu atorsinnaasaminnik nassaarnissaminnut.

Villads Villadsen:  
Inuillami serrarpalaaq

Qupp. 149, akia 129 kr.  
Atuakkiorkfik november 2006

